



MEMORIA XUSTIFICATIVA DO CONVENIO DE COLABORACIÓN ENTRE A CONSELLERÍA DE POLÍTICA SOCIAL E XUVENTUDE E O CONCELLO DE MUÍÑOS, PARA A COLABORACIÓN NO FINANCIAMENTO DO PROGRAMA "COMEDOR SOBRE RODAS" NO EXERCICIO 2023

A Comunidade Autónoma de Galicia, segundo o establecido no artigo 27.23 do Estatuto de autonomía de Galicia, en consonancia coas competencias outorgadas ás comunidades autónomas polo artigo 148.1.20 da Constitución española, ten competencia exclusiva en materia de asistencia social, polo que, na súa virtude aprobouse a Lei 13/2008, do 3 de decembro, de servizos sociais de Galicia.

A Consellería de Política Social e Xuventude, segundo o Decreto 124/2022, do 23 de xuño, polo que se establece a súa estrutura orgánica, é o órgano superior da administración xeral da Comunidade autónoma de Galicia ao que lle corresponde propoñer e executar as directrices xerais do goberno no ámbito do benestar, que engloban, entre outras as competencias en materia de servizos sociais, incluíndo as políticas de familia, menores, benestar social, inclusión social, servizos comunitarios, atención aos discapacitados e ás persoas maiores, a promoción da autonomía persoal e a atención ás persoas en situación de dependencia.

Que con carácter específico, corresponden, entre outras, á Dirección Xeral de Maiores e Atención Sociosanitaria, a elaboración das propostas para a formulación das políticas dirixidas ás persoas maiores da Consellería de Política Social e Xuventude en aplicación da Lei 13/2008, do 3 de decembro, de servizos sociais de Galicia e da Lei 39/2006, do 14 de decembro, de promoción da autonomía persoal e atención ás persoas en situación de dependencia. En particular, ten encomendadas as funcións relativas ao fomento e á promoción de actuacións e medidas favorecedoras da plena participación das persoas maiores na sociedade e da mellora da súa calidade de vida, así como todas aquelas accións que faciliten a súa promoción, integración social e participación activa.

Para a mellor atención das necesidades sociais do seu ámbito territorial, e unha vez garantida a prestación dos servizos sociais comunitarios básicos e demais competencias enumeradas no artigo 60 da Lei 13/2008, de 3 de decembro, os concellos de Galicia poden crear, xestionar e manter servizos sociais especializados, en coordinación coa Xunta de Galicia e de acordo co catálogo de servizos sociais e a planificación correspondente.

A Xunta de Galicia promoverá unha efectiva coordinación e cooperación cos concellos a fin de asegurar a calidade e unha cobertura equilibrada dos servizos sociais en todo o territorio, especialmente no que atinxe á creación e mantemento de servizos sociais comunitarios específicos.

O obxecto do presente convenio é contribuír ao financiamento por parte da Consellería de Política Social e Xuventude do programa "Comedor sobre rodas" no exercicio 2023. A través deste programa as persoas usuarias reciben diariamente no seu domicilio o xantar e cea adaptado ás prescricións médicas individuais.

Para o cumprimento da finalidade prevista na cláusula primeira deste convenio a Consellería de Política Social e Xuventude achegará a contía de **cincuenta e cinco mil euros (55.000,00€)**, que serán imputados á aplicación orzamentaria **13.05.312E.460.0** dos orzamentos xerais da Comunidade Autónoma de Galicia para o ano 2023. Este





financiamento terá vixencia desde o momento da sinatura do convenio e ata o 31 de decembro de 2023, con efectos económicos dende o 1 de xaneiro de 2023.

O carácter singular deste programa en base ás razóns que acreditan o interese social do mesmo, radica na análise das circunstancias demográficas deste concello, da cobertura de servizos sociais públicos actuais e da estimación da poboación maior dependente que demandará un servizo asistencial. O Concello de Muíños que, segundo datos do Instituto Nacional de Estadística, no 2022 contaba cunha poboación de 1.424 habitantes, dos cales eran persoas maiores de 64 anos 634, o que representa unha porcentaxe do 44,5% da poboación municipal, contando cunha media de idade que ronda os 60 anos. Ademais hai un elevado número de persoas maiores que viven soas, nos 38 núcleos de poboación dispersos ao longo de 110 quilómetros cadrados, e moitas destas persoas teñen algún grao de dependencia e carecen do apoio familiar. Aos efectos, o Concello pon en marcha o programa "Comedor sobre rodas", como recurso axeitado para que as persoas maiores residentes no Concello de Muíños que presentan dificultades para desenvolver axeitadamente o proceso de compra, preparación e elaboración de comidas, non abandonen as súas casas.

A través deste programa as persoas destinatarias reciben diariamente nas súas casas o xantar e cea adaptado ás prescricións médicas individuais. Tendo en consideración que se trata dun concello xeograficamente afastado da capital da provincia, o que dificulta o acceso a programas orientados ás persoas maiores, xustifícase o carácter singular deste programa, en base a razóns de interese social co obxecto de dar cobertura á poboación maior e dependente que demanda este servizo asistencial.

En relación ás razóns que motivan a concesión de forma directa desta subvención debido á dificultade da súa convocatoria pública, en base aos artigos 19.4,c) e 26 da Lei 9/2007, do 13 de xuño, de subvencións de Galicia, e no artigo 40 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, é debido á particularidade e exclusividade da entidade que desenvolve este proxecto que é o Concello de Muíños. As características da poboación, e as actuacións do programa a subvencionar a través do convenio son circunstancias que dificultan a súa convocatoria pública.

Asinado dixitalmente en Santiago de Compostela

O director xeral de Maiores e Atención Sociosanitaria

Antonio Acevedo Prado

